


septembar - oktobar



20 godina

Info | Centralna banka BiH
2017

U ovom broju:

MEĐUNARODNA
KONFERENCIJA CBBiH „20
GODINA STABILNOSTI“



VALENTIN INZKO – CBBiH
JE ISTINSKA USPJEŠNA
PRIČA

MONOGRAFIJA „20
GODINA STABILNOSTI“



ANITA DUJMOVIĆ
IMENOVANA ZA GLAVNOG
INTERNOG REVIZORA
CBBiH

VELIKI BROJ POSJETA
IZLOŽBI „TRAGOM NOVCA“



CBBiH NA TREĆOJ
FINANSIJSKOJ
KONFERENCIJI „FINCONF“
U SARAJEVU



Izdavač: Centralna banka Bosne i Hercegovine;
Adresa: Maršala Tita 25, 71000 Sarajevo

Priprema: Služba za odnose sa javnošću

Prevod tekstova na engleski jezik: Služba za odnose sa javnošću

Lektura (jezici bh. naroda i engleski jezik): Služba za publikacije i biblioteku i
Služba za protokol i provođenje

Web stranica: <http://www.cbbh.ba>
E-mail: pr@cbbh.ba
kontakt telefon: (033) 278 123

GUVERNER SOFTIĆ
PRISUSTVOVAO
GODIŠNJOJ SKUPŠTINI
MEĐUNARODNOG
MONETARNOG FONDA I
SVJETSKE BANKE




STANDARD&POOR'S
POTVRDIO KREDITNI
REJTING BiH



U CBBiH OBILJEŽEN
SVJETSKI DAN ŠTEDNJE



DEPOZITI GRAĐANA VEĆI
OD 11 MILIJARDI KM



MEĐUNARODNA KONFERENCIJA CBBiH „20 GODINA STABILNOSTI“



Brojni zvaničnici iz zemlje i svijeta prisustvovali su konferenciji „20 godina stabilnosti“ Centralne banke Bosne i Hercegovine (CBBiH), koja je održana 22. 9. 2017. u Sarajevu i stavovi su usaglašeni – Centralna banka Bosne i Hercegovine je ključna za očuvanje monetarne stabilnosti, a valutni odbor nema alternativu.

Domaćin konferencije, guverner CBBiH dr. Senad Softić zahvalio se gostima na prepoznavanju značaja godišnjice, naglasivši da centralno bankarstvo u Bosni i Hercegovini ima istoriju mnogo dužu od 20 godina.

On je podsjetio na glavni cilj CBBiH postizanje i održavanje stabilnosti domaće valute, konvertibilne marke, jedinog zakonskog sredstva plaćanja u Bosni i Hercegovini i osvrnuo se na istorijat nastanka CBBiH i izazove u proteklom periodu.

Prema guvernerovim riječima, CBBiH je od samog početka prepoznala značaj makroekonomske statistike, mnogo prije drugih institucija u zemlji, posmatrajući je kao javno dobro uz stalno prilagođavanje međunarodnim standardima.

„Koristeći mehanizam koordinacije bankarske supervizije, uspjeli smo da konsolidujemo podatke entitetskih agencija za bankarstvo, izvještavajući o pokazateljima finansijskog zdravlja za cijeli bankarski sistem“, rekao je guverner Softić i naveo neke od rezultata tih aktivnosti, poput redovnih makroekonomskih testova na stres, stalnog nadgledanja sistemskih rizika, potpisane memorandume o razumijevanju

i saradnji s regulatornim institucijama iz zemalja porijekla bankarskih grupa koje su aktivne u Bosni i Hercegovini te uspostavljanje Centralnog registra kredita, koji pomaže bankama da upravljaju rizicima.

Guverner je podsjetio i na uspješno prevazilaženje krize 2008. godine, kada je potvrđena puna pokrivenost konvertibilne marke, te naglasio značaj međunarodne saradnje i postojanja predstavnika na lokalnom i međunarodnom nivou, „naročito za evropske integracije, kao na primjer, obezbjeđivanje odgovora za upitnik Evropske komisije“.

„Takođe veoma cijenimo podršku Međunarodnog monetarnog fonda koji je imao ključnu ulogu u uspostavljanju Centralne banke, prije dvadeset godina“, rekao je guverner i izrazio očekivanje da će se ova podrška nastaviti u budućnosti. A u budućnosti CBBiH će, prema guvernerovim riječima, nastaviti sa svojom misijom usklađivanja sa standardima EU, modernizaciju i poboljšanje rada platnih sistema i trezorskih poslova te povećati svoj institucionalni kvalitet.

Guverner je zaključio da je rad ove institucije uspješan zahvaljujući prvenstveno njenim ljudskim resursima.

Član Izvršnog odbora Evropske centralne banke (ECB) Benoît Coeure istakao je povodom dvadesetogodišnjice CBBiH da je postignut primarni cilj – postizanje monetarne stabilnosti, uz efikasno implementiranje aranžmana currency boarda, čime je stvoreno povjerenje u valutu i Centralnu banku.



„Želio bih da čestitam prošlom i sadašnjem menadžmentu i svim službenicima CBBiH za ovaj uspjeh koji je postignut tokom proteklih 20 godina. Vaša postignuća su posebno značajna kada se posmatraju u svjetlu izazova s kojima ste se suočavali u implementaciji monetarnog okvira.“, rekao je Coeure i dodao da je malim otvorenim ekonomijama kao što je Bosna i Hercegovina teško predvidjeti spoljne šokove, što jesu teške okolnosti za centralne banke.

On je napravio osvrt na poboljšanja u svjetskoj ekonomiji, pad nezaposlenosti, stabilizaciju cijena nafte i doprinos eurozone globalnom rastu, što se pozitivno odražava na Bosnu i Hercegovinu, gdje izvoz za eurozonu čini više od polovine ukupnog izvoza.

„Potrebne su korijenite strukturalne reforme za podsticanje potencijalnog rasta, podizanje produktivnosti, povećanje otpornosti na šokove i konačno, stimulisanje održive realne konvergencije između država članica“, dodao je Coeure i podsjetio na saradnju ECB-a sa centralnim bankama u zemljama kandidatima, gdje je CBBiH jedna od prvih korisnika tehničke saradnje.

Coeure je tokom obraćanja govorio o valutnoj supstituciji, tj. činjenici da su u prosjeku 56% ukupnih kredita i 52% ukupnih depozita izraženi u ili imaju valutnu klauzulu prema stranim valutama, u većini slučajeva prema euru.

„Nezvanična euroizacija, iako je znak povjerenja u euro kao stabilnu zalihu vrijednosti, predstavlja rizik finansijske stabilnosti u slučaju naglih i značajnih variranja deviznog kursa. Građani i preduzeća mogu u jednom trenutku postati nesposobni da servisiraju dug izražen u stranoj valuti, stvarajući kreditni rizik za banke. Isto vrijedi za dolarizaciju u drugim dijelovima svijeta, kako je jasno pokazala azijska finansijska kriza“, rečeno je tokom obraćanja.

On je naglasio da uspjeh centralnih banaka u održavanju povjerenja u valutu suštinski zavisi od dva elementa: političke nezavisnosti i jasnog mandata.

Visoki zvaničnik je istakao zadovoljstvo zbog uspješne saradnje ECB-a s centralnim bankama Zapadnog Balkana i zahvalio se domaćinima na dobrodošlici.

Član Predsjedništva Bosne i Hercegovine Mladen Ivanić izjavio je da je valutni odbor za vrijeme u kojem se nalazimo najbolji koncept za Bosnu i Hercegovinu, izrazivši uvjerenje da je zahvaljujući toj činjenici spriječen ciklus inflacije i nepovjerenja u bh. valutu.

On je poručio da politiku u toj oblasti ne treba mijenjati i da bi političke strukture svojim uplitanjem samo proizvele nestabilnost.

Prema njemu, bankarski sektor je jedan od solidnih stubova bh. ekonomije, zaključivši da je CBBiH u ovih 20 godina uradila upravo uspostavljanje povjerenja u domaću valutu čiji su stabilnost i kredibilitet neupitni.

Predsjedavajući Vijeća ministara Denis Zvizdić izrazio je zadovoljstvo i čast povodom prisustvovanja posebnoj konferenciji kojom se obilježava 20 godina uspješnog rada CBBiH, što je „značajan jubilej ne samo za Centralnu banku već i za čitavu državu“.

„U složenom političkom ambijentu, Centralna banka je sve ove godine uspjela da sačuva i održi stabilnost.“, istakao je Zvizdić i podsjetio na najvažnije događaje iz istorije CBBiH i značajnu podršku pruženu od strane MMF-a, a potom Evropske komisije.

„Stabilna i pouzdana centralna banka daje ključan doprinos makroekonomskoj stabilnosti, unapređuje proces ekonomske tranzicije i konvergencije ka tržišnoj ekonomiji i doprinosi cjelokupnoj boljoj pripremljenosti zemlje za članstvo u EU“, dodao je predsjedavajući Zvizdić, osvrćući se na značaj institucije centralne banke na putu BiH ka EU.

Šef Delegacije Evropske unije u Bosni i Hercegovini i specijalni predstavnik EU u BiH ambasador Lars-Gunnar Wigemark poručio je da Centralna banka pokazuje uspjeh bez obzira na izazove, poput finansijske krize 2008. godine. Wigemark je povukao metaforu da most s novčanice od 200 KM predstavlja most ka EU, osvrnuvši se i na taj segment.

„Centralna banka će morati biti dio svih ovih procesa, kao glavni akter ili kao dio tima u smislu koordinacijskog mehanizma ove zemlje na njenom putu EU“, istakao je Wigemark i dodao da valutni odbor i nezavisnost Centralne banke nemaju alternativu.

Konferencija je strukturirana u tri sesije. U okviru prve sesije, na proteklih 20 godina CBBiH, osvrnuli su se bivši guverneri Peter Nicholl i dr. Kemal Kozarić i aktuelni guverner CBBiH dr. Senad Softić. Posebna obraćanja na početku imali su Nadim

Ilahi, šef Misije Međunarodnog monetarnog fonda za Bosnu i Hercegovinu i Linda van Gelder, direktorica Svjetske banke za Zapadni Balkan.

Druga sesija bila je posvećena novim izazovima za centralne banke u procesu pridruživanja Evropskoj uniji, dok se tema treće sesije odnosila na ključne makroekonomske aspekte u procesu pridruživanja Evropskoj uniji. U te dvije sesije učestvovali su čelnici centralnih banaka Makedonije, Srbije, Crne Gore, Albanije, Rumunije, Slovenije, Hrvatske, Bugarske te visoki predstavnici Evropske banke za obnovu i razvoj (EBRD) i Direkcije za ekonomske i finansijske poslove Evropske komisije.

KONFERENCIJA ZA MEDIJE GUVERNERA CBBiH

Na konferenciji za novinare, guverner Centralne banke Bosne i Hercegovine (CBBiH) dr. Senad Softić istakao je da je međunarodnoj konferenciji pod nazivom „20 godina stabilnosti“ prisustvovalo oko 150 zvanica, među kojima su bili najviši domaći i međunarodni zvaničnici, guverneri, viceguverneri i drugi visoki zvaničnici centralnih banaka iz 15 zemalja regiona i Evrope, potom zvaničnici visokog ranga iz Evropske centralne banke, Evropske unije u BiH, međunarodnih finansijskih institucija, ambasadori i predstavnici svih subjekata finansijskog sektora u zemlji.

Guverner Softić kazao je da je konferencija bila prilika da se čuju iskustva drugih zemalja, od kojih su neke već članice Evropske unije, neke su otvorile poglavlja u procesu pridruživanja, a koja će nam biti od izuzetnog značaja. „Sigurni smo da će razmjena ideja i iskustava omogućiti Centralnoj banci Bosne i Hercegovine, kao i zemlji u cjelini, da se što bolje pripreme za put i proces koji je pred nama“, rekao je guverner.

Konferencija je bila i prilika za promociju Monografije i jubilarne suvenir novčanice koje je CBBiH izdala u povodu ovog značajnog jubileja. Na dan održavanja konferencije, zatvorena je postavku novca u Zemaljskom muzeju Bosne i Hercegovine, koja je pod nazivom „Tragom novca“ bila otvorena od 11. 8. 2017.

„Ono što želim istaći je da je od osnivanja do danas, Centralna banka Bosne i Hercegovine prošla kroz veliki broj izazova

– od uvođenja jedinstvene valute na teritoriji cijele BiH, reforme platnog prometa, pružanja podrške stabilnom funkcionisanju bankarskog sektora, očuvanja povjerenja u bankarski sektor i stabilnost valute tokom finansijske krize 2008. godine, realizacije projekata s Evropskom centralnom bankom i centralnim bankama eurosistema, do uvođenja evropskih standarda centralnog bankarstva u poslovanje ove institucije. Obilježavajući dvije decenije rada, mogu reći da je Centralna banka Bosne i Hercegovine sve aktivnosti koje su joj date mandatom, a od koje je najvažnija očuvanje monetarne stabilnosti, izvršavala profesionalno i posvećeno, usmjerena na kvalitet posla koji obavlja“, riječi su guvernera Softića.

Monetarna stabilnost, dodao je, ostaje primarni zadatak Centralne banke Bosne i Hercegovine i u budućnosti, a pred institucijom su nove i zahtjevnije obaveze i novi izazovi. Budući prioriteti dijele se u dva prvac – jedan se odnosi na interno unapređenje poslovnih procesa i organizacije Centralne banke, a drugi na obaveze BiH na putu ka evropskim integracijama gdje i Centralna banka Bosne i Hercegovine ima značajnu ulogu.

Na kraju je zahvalio medijima na profesionalnom i korektnom praćenju aktivnosti Centralne banke Bosne i Hercegovine.

MONOGRAFIJA „20 GODINA STABILNOSTI“



Centralna banka Bosne i Hercegovine (CBBiH) predstavila je, povodom jubilarne 20. godišnjice rada, Monografiju „20 godina stabilnosti, 1997-2017“ koja obuhvata sve značajne aspekte rada Centralne banke Bosne i Hercegovine tokom njenog postojanja.

U ovoj grafički obogaćenoj publikaciji hronološkim su redoslijedom predstavljeni najznačajniji događaji od osnivanja Centralne banke 11. augusta 1997. članom 7. Ustava Bosne i Hercegovine, preko njenog razvoja do očekivanih aktivnosti u budućnosti. Zasebno su odvojena poglavlja koja se tiču funkcija – provođenja monetarne politike, održavanja platnog

sistema zemlje, vršenja uloge fiskalnog agenta, trezorskog poslovanja, prikaz statističkih podataka i održavanja finansijske stabilnosti.

Glavni i odgovorni urednik Monografije je guverner CBBiH dr. Senad Softić, a autori i recenzenti su eminentni stručnjaci iz oblasti ekonomije i bankarstva, koji su iz različitih aspekata kao učesnici ili posmatrači pratili dvadesetogodišnji rad ove institucije.

U uvodnoj riječi guvernera, istaknut je značaj nezavisnosti, odgovornosti i transparentnosti koji ovu instituciju čine kredibilnom. Posebno je naglašena reputacija banke u unutrašnjim i međunarodnim krugovima po osnovi kvaliteta i kredibiliteta informacija i analiza koje banka razmjenjuje kroz saradnju s relevantnim institucijama.

Takođe, monografija sadrži listu grafikona deviznih rezervi CBBiH, pokrivenosti monetarne pasive neto deviznim rezervama te stanja računa rezervi i stopa obavezne rezerve, a pored analiza i statistika, monografija je obogaćena i brojnim galerijama fotografija.

Monografija je promovisana u okviru konferencije „20 godina stabilnosti“ koju je u Sarajevu 22. 9. 2017. organizovala CBBiH.

VELIKI BROJ POSJETA IZLOŽBI „TRAGOM NOVCA“



U periodu od 11. 8. do 22. 9. 2018. godine, u Zemaljskom muzeju Bosne i Hercegovine u Sarajevu, u povodu 20. godišnjice, Centralna banka Bosne i Hercegovine (CBBiH) u saradnji sa Zemaljskim muzejom, postavila je izložbu novca pod nazivom „Tragom novca“.

Tokom ovog perioda, CBBiH je organizovala posjete učenika srednjih škola ovoj izložbi, koji su istinski bili zainteresovani za novac koji je bio u opticaju na teritoriji današnje Bosne i Hercegovine, od 4. vijeka prije nove ere do 21. vijeka, a koji su dio kolekcije novca u vlasništvu Zemaljskog muzeja BiH ili CBBiH, uključujući i novac koji je trenutno u opticaju. Također, interesovanje su pokazali za zaštitna obilježja novčanica

u opticaju, o čemu su ih informisale kolege iz Odjeljenja trezora CU CBBiH. Izložbu su posjetili srednjoškolci, članovi Udruženja Vijeća mladih Kantona Sarajevo, a tokom više od mjesec dana trajanja postavke, Zemaljski muzej BiH, pa samim tim i postavku novca, od otvaranja u augustu obišlo je 2.675 odraslih i 738 djece, a u septembru, do zatvaranja izložbe, 1.283 odrasle osobe i 412 djece.

Tokom trajanja izložbe u Zemaljskom muzeju je prikazivan promotivni spot i video film o CBBiH.

ČESTITKE ZA ORGANIZACIJU KONFERENCIJE



Veliki broj istaknutih gostiju zahvalio se organizatorima konferencije u Centralnoj banci Bosne i Hercegovine (CBBiH) povodom 20. godišnjice rada ove institucije. Hrvatski ekonomista i bivši guverner Hrvatske narodne banke (HNB) Marko Škreb zahvalio se CBBiH na pozivu i „sjajno organizovanoj konferenciji“ istakavši da svi mogu biti

ponosni na instituciju Centralne banke te izrazio zadovoljstvo povodom boravka u Sarajevu. „Obavili ste veoma dobar posao u pripremi događaja i ispraćaju gostiju. Sve najljepše vama i vašoj zemlji“, istakla je u zahvalnici direktorica Kancelarije za ekonomsku analizu Narodne banke Austrije Doris Ritzberger-Gruenwald. Bivši guverner CBBiH Peter Nicholl pohvalio je konferenciju u cijelosti kao i izvršni direktor Centralne banke Crne Gore (CBCG) Radoica Luburić koji se zahvalio domaćinima s guvernerom na čelu. „Prije svega, želimo se zahvaliti na ljubaznom gostoprimstvu“, rečeno je u zahvalnici guvernera Centralne banke Albanije Genta Sejka i šefa osoblja CB Albanije Donalda Duraja. Čestitke su stigle i od kolega iz CBBiH. „Čestitam vam na odličnoj organizaciji konferencije. Sve pohvale našem protokolu i timu koji je bio angažovan“, rečeno je u zahvalnici koordinatora za bankarsku superviziju CBBiH Ljiljane Marjanović, a čestitku za dobro obavljen posao dostavila je i rukovodilac Službe za publikacije Zorica Vučićević.

VALENTIN INZKO – CBBiH JE ISTINSKA USPJEŠNA PRIČA



Visoki predstavnik Valentin Inzko posjetio je 21. 9. 2017. godine Centralnu banku Bosne i Hercegovine (CBBiH) povodom zvaničnog obilježavanja 20. godišnjice ove institucije. Visoki predstavnik je iskoristio priliku da guverneru dr. Senadu Softiću i ranijim guvernerima, sadašnjim i bivšim članovima Upravnog vijeća Centralne banke, kao i svim zaposlenicima banke, čestita na postizanju i očuvanju najviših profesionalnih standarda.

„Tokom 1996. godine, Ured visokog predstavnika (OHR) je, kao garant provedbe Općeg okvirnog sporazuma za mir, predvodio napore koji su imali za cilj uspostavu jedne od

institucija predviđenih Dejtonskim sporazumom – Centralne banke Bosne i Hercegovine – čime su stvoreni uslovi za rad institucije koja je postala temelj stabilnosti monetarnog i finansijskog sektora Bosne i Hercegovine kao i poslijeratnog oporavka i razvoja BiH. Danas Centralna banka nastavlja biti garant stabilnosti i razvoja u BiH i primjer profesionalne, nezavisne institucije koja ulijeva povjerenje. Ponosan sam na činjenicu da je OHR učestvovao u ovoj istinski uspješnoj priči“, rekao je visoki predstavnik Inzko.

ANITA DUJMOVIĆ IMENOVANA ZA GLAVNOG INTERNOG REVIZORA CBBiH



U skladu sa zaključkom sa 16. sjednice Upravnog vijeća Centralne banke Bosne i Hercegovine (CBBiH) održane 4. 10. 2017. godine, Anita Dujmović, imenovana je za glavnog internog revizora CBBiH na mandatni period u trajanju od četiri godine, počevši od 24. 10. 2017. godine do 23.10.2021. godine.

Anita Dujmović je po završetku fakulteta, dugogodišnjim radom u nekoliko velikih i uspješnih komercijalnih banaka u Federaciji Bosne i Hercegovine, sticala radno

iskustvo u poslovanju s klijentima, poslovima platnog prometa, poslovima organizacije i tehnologije u bankama, računovodstvu i izvještavanju i kontroli usklađenosti poslovanja u bankama. Zadnjih 13 godina koordinirala je aktivnostima sprečavanja pranja novca i finansiranja terorističkih aktivnosti i rukovođila funkcijama kontrole usklađenosti u ADDIKO bank d.d. Sarajevo. Od 2006. godine bila je aktivan član Komisije za praćenje provedbe Zakona o sprečavanju pranja novca i finansiranja terorističkih aktivnosti u Udrženju banaka Bosne i Hercegovine te učestvovala u radu brojnih konferencija i okruglih stolova u vezi s aktuelnim temama iz ove oblasti.

Takođe, učestvovala je na brojnim edukacijama, seminarima i konferencijama u zemlji i inostranstvu iz oblasti bankarstva, upravljanja kvalitetom poslovanja organizacije, kontrole usklađenosti, provođenja internih istraga prevara i neetičnog ponašanja zaposlenih.

Zvanje Internal quality auditor (ISO 90014:2000) i certifikat od strane Bureau Veritas stekla je 2002. godine te uspješno je prošla trening „Razvoj menadžera“ u organizaciji Gentis d.o.o. Zagreb.

CBBiH NA TREĆOJ FINANSIJSKOJ KONFERENCIJI „FINCONF“ U SARAJEVU



Nakon dva veoma uspješna izdanja u 2015. i 2016. godini, u Sarajevu je 5. i 6. 10. 2017. godine organizovana i treća međunarodna konferencija posvećena inovacijama u finansijskom sektoru FinConf, u čijem radu je učestvovala i Centralna banka Bosne i Hercegovine (CBBiH). Konferencija je okupila veliki broj renomiranih predavača iz zemlje, regiona i Evrope, koji su u okviru šest panela ponudili izuzetno zanimljive prezentacije nakon kojih su uslijedile kvalitetne i stručne diskusije.



Predstavnik CBBiH na konferenciji, rukovodilac Službe za operative platne sisteme Odjeljenja za platne sisteme CBBiH Halid Tvico predstavio je, u okviru panel disusije o temi „Plaćanja“, ulogu i značaj platnih sistema kojim CBBiH uspješno upravlja od 2001. godine.

Istaknuto je da platni sistemi žirokliringa i BPRV obezbjeđuju sigurno i stabilno odvijanje platnog prometa, a za slučaj vanrednih okolnosti, CBBiH je obezbijedila rezervni sistem u Glavnoj banci Republike Srpske CBBiH Banja Luka.

Kroz platne sisteme CBBiH, zabilježen je rast broja i vrijednosti transakcija, čemu idu u prilog brojke od 40.004.202 realizovanih transakcija u 2016. godini u ukupnoj vrijednosti od preko 88 milijardi KM. Ukupna vrijednost kartičnih transakcija u 2016. godini iznosila je 8,7 milijardi KM.

U okviru diskusije, konstatovano je da se većina transakcija odnosi na podizanje gotovine, a manji dio na plaćanja roba i usluga, a najavljeni su i novi projekti na kojima radi CBBiH – Jedinstveni registar računa za fizička lica, nadogradnja postojećeg registra za pravna lica, kao i SEPA ACH.

Što se tiče kliringa međunarodnih plaćanja s Republikom Srbijom, naglašeno je da samo četiri banke učestvuju u razmjeni i da je takav sistem slabo korišten, iako je ovaj način odvijanja platnog prometa povoljan. S tim u vezi, CBBiH je sugerisala komercijalnim bankama da razmotre korištenje ove usluge, budući da su provizije znatno niže u odnosu na posredničke banke za valutu euro.

NAJUSPJEŠNIJIM BANKAMA DODIJELJEN ZLATNI BAM

Nakon zvaničnog dijela konferencije, održana je svečanost dodjele tradicionalnih nagrada „Zlatni BAM“, koje magazin „Banke u BiH“ dodjeljuje najuspješnijim bh. bankama u prethodnoj godini. Za najveću aktivu, najveći ukupan kapital i prinos na dionički kapital (ROE) dobitnik nagrade „Zlatni BAM“ je UniCredit Bank d.d. Mostar, za najveću aktivu banaka s pretežno domaćim kapitalom Nova Banka a.d. Banja Luka, za najveći dionički kapital Raiffeisen Bank BiH, za najveći doprinos na aktivu ROA, NLB Banka a.d. Banja Luka, a za najveći rast depozita Vakufska banka d.d. Sarajevo.

Pored sedam standardnih nagrada, prvi put je dodijeljena i specijalna nagrada „Zlatni BAM Premium 2017“ – za inovativnost i unapređenje iskustva klijenata banaka. To priznanje dodijeljeno je kompaniji Asseco See d.o.o. Sarajevo koja je, u okviru poslova na modernizaciji mreže bankomata Addiko banke, klijentima omogućila pristup novim bankomatima koji spadaju u red najmodernijih na tržištu.

GUVERNER SOFTIĆ PRISUSTVOVAO GODIŠNJOJ SKUPŠTINI MEĐUNARODNOG MONETARNOG FONDA I SVJETSKE BANKE



Guverner Centralne banke Bosne i Hercegovine (CBBiH) dr. Senad Softić boravio je od 13. do 15. 10. 2017. godine u Washingtonu gdje je, u sastavu delegacije BiH, prisustvovao Godišnjoj skupštini Međunarodnog monetarnog fonda i Svjetske banke te bilateralnim sastancima s visokim dužnosnicima ovih finansijskih institucija.

Guverner Softić prisustvovao je Plenarnoj sjednici i otvorenju Godišnje skupštine MMF-a i SB te sastanku holandsko-belgijske Konstituenice MMF-a i SB kojoj pripada i BiH, tokom kojeg je

razgovarano o aktuelnim ekonomskim i finansijskim temama u zemljama članicama Konstituenice kao i ekonomskom razvoju i finansijskoj stabilnosti država članica Konstituenice. Ovi sastanci su bili prilika da se razgovara o temama o kojima Konstituenca treba imati stav na sastancima MMF-a i Svjetske banke.

Kao član bh. delegacije i u svojstvu guvernera u Svjetskoj banci za vrijeme trajanja Godišnje skupštine, guverner Softić je prisustvovao sastancima s direktorom Odjela MMF-a za Evropu Poulom Thomsenom, izvršnim direktorom u MMF-u Anthonyem de Lannoyem i šefom Misije MMF-a za BiH Nadeemom Ilahijem, potom s izvršnim direktorom u SB Frankom Heemskerkom, direktoricom SB za Zapadni Balkan Lindom van Gelder i potpredsjednikom SB za ECA regiju Cyrilom Mullerom. Tokom ovih sastanaka bilo je riječi o ekonomskim kretanjima, monetarnoj politici, bankarskom i finansijskom sektoru te o aktuelnostima u vezi s implementacijom preporuka iz Pisma namjere s MMF-om. Posljednjeg dana boravka u Washingtonu održan je sastanak s predstavnicima zemalja Zapadnog Balkana o izazovima i mogućnostima u sektoru privredne javne infrastrukture i bankarskog sistema, čiji domaćin je bio Poul Thomsen, direktor Odjela za Evropu u MMF-u.

STANDARD&POOR'S POTVRDIO KREDITNI REJTING BiH



Međunarodna agencija Standard and Poor's potvrdila je kreditni rejting Bosne i Hercegovine, B sa stabilnim izgledima. Analitičari agencije Standard and Poor's u obrazloženju su naveli da se rejting bazira na činjenici da je fiskalni deficit održiv, uprkos kašnjenju nastavka Proširenog programa (Extended Fund Facility – EFF) koji je odobren prošle godine od Međunarodnog monetarnog fonda (MMF) i da ekonomija zemlje ima umjeren rast, a koji pozitivno utiču na fiskalne prihode.

Stabilni izgledi odražavaju mišljenje analitičara ove agencije da će vlada biti u mogućnosti pokriti finansiranje budžetskih potreba na domaćem tržištu kapitala i da će se u narednih 12 mjeseci usmjeriti na ispunjavanje uslova iz Proširenog

programa s MMF-om. Također, vanjski dug je ocijenjen kao relativno nizak i pod povoljnim uslovima kreditiranja. Agencija Standard and Poor's je ustanovila da je BiH opredijeljena očuvanju nezavisnosti Centralne banke Bosne i Hercegovine i stabilnosti monetarne politike po principima valutnog odbora pod kojim se podrazumijeva puna pokrivenost monetarne baze deviznim rezervama centralne banke.

U narednom periodu kreditni rejting BiH mogao bi biti smanjen ukoliko ne bi bilo predviđene tranše MMF-a, pa bi došlo do potrebe za finansiranjem izvana i do pritiska nelikvidnosti na nivou oba entiteta u narednih 12 mjeseci.

U CBBiH OBILJEŽEN SVJETSKI DAN ŠTEDNJE



Obilježavanje ovogodišnjeg Svjetskog dana štednje u Centralnoj banci Bosne i Hercegovine (CBBiH) proteklo je u znaku 20. godišnjice rada koju institucija obilježava pod sloganom „20 godina stabilnosti“. Važnost štednje je nesumnjivo velika i u današnje vrijeme, jer štedišama omogućava da stvore rezerve za buduću potrošnju i moguće finansijske teškoće, a štednja, istodobno, stvara preduslove finansijskim institucijama za kreditiranje realnog sektora ekonomije.

U povodu obilježavanja Svjetskog dana štednje, Centralnu banku Bosne i Hercegovine posjetili su učenici trećeg razreda

sarajevske Osnovne škole „Osman Nakaš“ i maturanti Srednje ekonomske škole iz Maglaja. Prilikom posjete, osnovci su obišli postavku novca u zgradi CBBiH, a o značaju i potrebi da štede govorio je guverner dr. Senad Softić. Za maturante je upriličena prezentacija pod nazivom „Štednja i odgovorno upravljanje novcem“ te kviz znanja. Posjeta učenika je ujedno i sastavni dio finansijske edukacije koju posljednjih godina provodi CBBiH, s ciljem jačanja finansijske inkluzije na način odgovornog upravljanja finansijama za dobrobit ekonomskog razvoja i rasta Bosne i Hercegovine. Tako je do sada CBBiH otvorila vrata učenicima osnovnih i srednjih škola

te studentima iz cijele Bosne i Hercegovine i univerziteta izvan Bosne i Hercegovine (SAD, Austrija).

Svjetski dan štednje bio je prilika da se učenicima podijeli publikacija za djecu pod nazivom „Novko i Novčica u svijetu novca“ koju je objavila CBBiH u saradnji s European Fund for South East Europe (EFSE) i udruženjem „U plusu“. Publikacija je sastavni dio projekta saradnje CBBiH i EFSE u oblasti promocije finansijske edukacije i inkluzije.

Također, prikazan je i prigodan film o CBBiH, novcu i štednji koji je postavljen na YouTube kanalu CBBiH. Svjetskim se danom štednje obilježava sjećanje na Prvi međunarodni kongres štedioničara, održan 31. 10. 1924. u Milanu, na kojem su predstavnici svjetskih štednih ustanova tražili izlaz iz krize koju je prouzrokovao Prvi svjetski rat te su zaključili da štednja predstavlja osnovu rasta i razvoja.

DEPOZITI GRAĐANA VEĆI OD 11 MILIJARDI KM



Svjetski dan štednje, koji se svake godine obilježava 31. oktobra, ove godine u znaku je najvećeg zabilježenog iznosa štednih uloga do sada.

Prema podacima Centralne banke Bosne i Hercegovine (CBBiH), depoziti građana čine 57,6% ukupnih depozita u komercijalnim bankama, te su, uz kontinuiran rast u 2017. godini, na kraju septembra dosegli, do sada, najviši zabilježeni nivo od 11,02 milijarde KM.

Prema ročnoj strukturi, oročeni i štedni depoziti u septembru 2017. iznosili su 5,44 milijarde KM, što predstavlja 49,4% ukupnih depozita stanovništva, a od toga kratkoročni depoziti (s rokom oročenja kraćim od godine dana) imali su 504 miliona KM ili 9,3%, a dugoročni 4,94 milijarde KM ili 90,7%. Transakcijski računi i depoziti po viđenju iznosili su 5,58 milijardi KM ili 50,6% ukupnih depozita stanovništva. Tokom prethodnih pet godina, evidentan je kontinuiran

snažniji porast depozita u domaćoj valuti, jer su na kraju 2012. godine učestvovali u ukupnim depozitima stanovništva sa 36,4%, a sada su dostigli gotovo 50%. Tako, depoziti stanovništva u KM valuti iznose 5,00 milijardi KM i imaju 45,4% udjela u ukupnim depozitima, a depoziti u eurima iznose 5,47 milijardi KM i imaju udio od 49,6%. Depoziti u ostalim stranim valutama iznose 549 miliona KM i imaju udio 5% u ukupnim depozitima stanovništva.

Depoziti stanovništva kontinuirano rastu, uprkos činjenici da prosječne plate i penzije ne bilježe značajan porast. U poređenju sa stanjem na kraju septembra 2016. godine, depoziti su porasli za čak 770,9 miliona KM ili 7,5%. Uprkos niskim kamatama na depozite, građani nastavljaju s držanjem depozita u domaćim bankama, što je pokazatelj uspostavljenog povjerenja u bankarski sektor i u sistem osiguranja depozita.

Oročeni i štedni depoziti rastu manjim intenzitetom i na godišnjem nivou su imali porast od oko 0,6% (odnosno 34,2 miliona KM). Znatno brže rastu transakcijski računi, koji su u poređenju sa stanjem na kraju septembra 2016. godine porasli za 17,4% (odnosno 411,4 miliona KM), zatim depoziti po viđenju koji bilježe porast od 13,1% (odnosno 325,3 miliona KM).

INFO CBBiH



